

四庫全書

子部

欽定四庫全書

冊府元龜卷七百十五 宋 王欽若等撰

宮臣部

忠於所事 昵狎 罪謹

忠於所事

士有修身立志策名委質夙夜匪懈思不出位風雨如晦不改其節所謂善於其職而無媿於人矣若乃肇建儲闈列樹藩戚尊崇保傅慎簡寮察所以贊翊元良保

又宗室式固本支以隆邦翰則有博識端士老成碩德  
周旋輔導朝夕規誨奉之以義不納於邪者蓋比比有  
焉其或處艱難之際奮不顧身明趨向之方繼之以死  
信可以敦激薄俗昭示後世者也

漢周昌為趙王相高祖宴駕太后使使召趙王昌令王  
稱疾不行使者三反昌曰高帝屬臣趙王

屬委也音  
之欲反

王

年少竊聞太后怨戚夫人欲召王并誅之臣不敢遣王  
王且亦不疾不能奉詔太后怒乃使使召趙相相至謁

太后太后罵昌曰爾不知怨戚氏乎而不遣趙王昌既  
徵高后使使召趙王王果來至長安月餘見鳩殺昌謝  
病不朝見三歲而薨

賈誼為梁王傅梁王勝墜馬死

文三王傳言揖此  
言勝為有兩名

誼自

傷為傅無狀

無善  
狀

嘗哭泣後歲餘亦死

韓安國事梁孝王為中大夫梁王以至親故得自置相  
二千石出入遊戲僭於天子

僭擬  
也

景帝聞之心不善太

后知帝不善迺怒梁使者弗見案責王所為安國為梁

使見大長公主而泣

大長公主景帝姊也

曰何梁王為人子之孝

為人臣之忠而太后曾不省也

省視也

夫前日吳楚齊趙

七國反自關以東皆合從而西嚮

從音子容切

唯梁最親為

艱難梁王念太后帝在中

京師為中猶言中國也

而諸侯擾亂一

言泣數行而下跪送臣等六人將兵擊卻吳楚吳楚以

故兵不敢西而卒破亡梁之力也今太后以苛禮責望

梁王

苛細也

梁王父兄皆帝王而所見者大故出稱蹕入

言警

蹕止行人也警令戒肅也天子出入皆備此儀而今云出稱蹕入言警者互舉之耳

車旗皆

帝所賜即以媯鄙小縣

媯音呼說切夸妣也

驅馳國中欲夸諸侯

令天下知太后帝愛之也令梁使來輒案責之梁王恐

日夜涕泣思慕不知所為何梁王之忠孝而太后不卹

也長公主具以告太后太后喜曰為帝言之言之帝心

迺解免冠謝太后曰兄弟不能相教迺為太后遺憂悉

見梁使厚賜之其後梁王益親驩太后長公主更賜直千

餘金

更音工衛切

繇此顯結於漢

竇嬰景帝時為栗太子傅十年太子廢嬰爭不能得謝

病屏居藍田山下數月諸賓賓客辨士說莫能來

史丹為駙馬都尉元帝令丹護太子家時傳昭儀子定

陶共王有材執

共讀曰恭

子母俱愛幸而太子頗有酒色之

失母王皇后無寵建昭之後元帝被疾不親政事留好

音樂

留意於音樂

或置鞀鼓殿下天子自臨軒檻上墮銅丸

以摘鼓

墮音頽下也摘音持益丁歷二切投也

聲中嚴鼓之節

莊嚴鼓節

後宮

及左右習知音者莫能為而定陶王亦能之帝數稱其

材丹進曰凡所謂材者敏而好學溫故知新皇太子是

也若乃器人於絲竹鼓鼙之間則是陳惠李微高於匡

衡可相國也

器人取人器能也陳惠李微皆黃門鼓吹也

於是帝默然而咲

咲古笑字

其後中山哀王薨太子前弔哀王者帝之少弟與

太子游學相長大

同處長養以至於壯大

帝望見太子感念哀王

悲不能自止太子既至前不哀帝大恨曰安有人不慈仁

而可奉宗廟為民父母者乎帝以責謂丹

謂者告語也

丹免

冠謝帝曰臣誠見陛下哀痛中山王至以感損向者太

子當進見臣竊戒屬毋涕泣感傷陛下

屬之欲切

罪迺在臣



當死帝以為然意乃解丹之輔相皆此類也竟寧元年

帝寢疾傅昭儀及定陶王常在左右而皇后太子希得

進見帝疾稍侵意忽忽不平

稍侵言漸篤也平和也

數問尚書以

景帝時立膠東王故事是時太子長舅陽平侯王鳳為

衛尉侍中與皇后太子皆憂不知所出

不知計所出

丹以親

密臣得侍視疾候帝間獨寢時丹直入卧內頓首伏青

蒲上

以青規地曰青蒲自非皇后不得至此

涕泣言曰皇太子以適長立

積十餘年

適讀曰嫡

名號繫於百姓天下莫不歸心臣竊見

定陶王雅素愛幸今者道路流言為國生意以為太子  
有動搖之議審若此公卿以下必以死爭不奉詔臣願  
先賜死以示羣臣天子素仁不忍見丹涕泣言又切至  
帝意大感喟然太息曰吾日困劣而太子兩王幼少意  
中戀戀亦何不念乎然無有此議且皇后謹慎先帝又  
愛太子吾豈可違指駙馬都尉安所受此語安焉也丹即  
却頓首曰愚臣妄聞罪當死却退也離青蒲上帝因密謂丹曰  
吾病寢加恐不能自還還讀日旋善輔道太子毋違我意道讀

曰丹噓唏而起

噓音虛唏  
許既切

太子繇是遂為嗣矣

後漢邳惲為上東城門侯光武令惲授皇太子彊經郭  
后既廢而太子意不自安惲乃說太子曰久處疑位上  
違孝道下近危殆昔高宗明君吉甫賢臣及有織介放  
逐孝子春秋之義母以子貴太子宜因左右及諸皇子  
引愆退身奉養母氏以明聖教不背所生太子從之帝  
竟聽許

張湛為太子太傅及郭氏廢因稱疾不朝拜大中大夫

居中東門候舍故時人號曰中東門君帝數存問賞賜  
朱暉為東平王蒼掾正月朔旦蒼當入賀故事少府給  
璧是時陰就為府卿貴驕吏傲不奉法蒼坐朝堂漏且  
盡而求璧不可得顧謂掾屬曰若之何暉望見少府主  
簿持璧即往給之曰我數聞璧而未嘗見試請觀之主  
簿以授暉顧召令吏奉之主簿大驚遽以白就就曰朱  
掾義士勿復求更以它璧朝蒼既罷召暉謂曰屬者掾  
自視孰與蘭相如光武聞而壯之

杜撫字叔和為驃騎將軍東平王蒼所辟及蒼就國掾  
史悉補王官屬未滿歲皆自劾歸時撫為大夫不忍去  
蒼聞賜車馬財物遣之辟太尉府

种暘為侍御史順帝擢監太子於承光宮中嘗侍高梵  
從中單駕出迎太子時太傅杜喬等疑不欲從惶惑不  
知所為暘乃手劔當車曰太子國之儲副天命所係今  
常侍來無詔何以知非姦邪今日有死而已梵辭屈不  
敢對馳命奏之詔報太子乃得去喬退而歎息愧暘臨

事不惑帝亦嘉其持重稱善者良久

吳謝景字叔發與刁玄羊衡等皆為太子登賓客及登  
薨景時為豫章太守不勝哀情棄官奔赴拜表自劾大  
帝曰君與太子從事異於他吏使中使慰勞聽復本職  
即遣還鄉

陸胤字敬宗凱弟也始為御史尚書選曹郎太子和聞  
其名待以殊禮會全寄楊竺等阿附魯王霸與和分爭  
陰相譖搆胤坐收下獄楚毒備至終無他辭

晉劉卞為愍懷太子左衛率知賈后廢太子之謀甚憂  
之以計干司空張華而不見用益以不平賈后親黨微  
服聽察外間頗聞卞言乃遷卞為輕車將軍雍州刺史  
卞知言泄恐為賈后所誅乃飲藥卒

江統為愍懷太子洗馬及太子廢徙許昌賈后諷有司  
不聽宮臣追送統與洗馬潘滔舍人杜蕤王敦魯瑤等  
冒禁至伊水拜辭道左悲泣流連

荀闈為齊王冏掾屬長沙王乂既誅冏暴尸於西明亭

三日而莫敢收斂闔表乞殯葬許之

盧志為成都王穎左長史穎之敗也官屬奔散唯志隨從不怠及穎薨親自殯送時人嘉之

王矩為長沙王國左常侍時成都王穎遣刺客圖長沙王入矩侍直見刺客色動殺之

丁潭為琅邪王褒郎中令褒薨潭上疏元帝求行終喪禮曰在三之義禮有違制近代以來或隨時降殺宜一釐革以敦於後輒案令文王侯之喪官僚服斬既葬而除



今國無繼統喪庭無主臣實陋賤不足當重謬荷首任  
禮宜終喪詔下博議詔使除服心喪三年

張禕為琅琊王國郎中令從王至雒還京都宋高祖封  
藥酒一甕付禕使密加酖毒禕受既還於道自飲而卒  
宋王璵之琅琊人有才局為竟陵王誕錄事參軍時誕  
在廣陵孝武遣戴明寶襲之誕遣壯士擊破之帝又遣  
車騎大將軍沈慶之討誕時璵之五子悉在建鄴璵之  
嘗乘城慶之縛其五子示而招之許以富貴璵之曰吾

受主王厚恩不可以二心三十之年未獲死所耳安可  
以私親誘之五子號叫於外呼其父及城平慶之悉撲  
殺之

南齊何昌寓為臨海王昭秀西中郎長史行荊州事明  
年上遣玄慶西害藩鎮諸王玄慶至荊州欲以便宜從  
事昌寓曰僕受朝廷意寄翼輔外藩何容以殿下付君  
一介之使若朝廷必須殿下還當更聽後旨昭秀以此  
得還京師

江泌為南康王子琳侍讀子琳為明帝所害泌往哭之  
淚盡以血親視殯葬乃去時廣漢王侍讀嚴桓之亦哭

王盡哀

王皎為晉安王子懋外兵參軍子懋叛明帝遣王玄邈  
及南北討使軍主裴叔業襲益城中兵參軍于琳之說  
子懋重賂叔業子懋使琳之往因說叔業請取子懋叔業  
遣軍主徐玄慶將四百人隨琳之入城僚佐皆奔散唯  
周英及皎更移入城內子懋聞之歎曰不意吾府有義

士二人琳之從二百人伏入齋子懋笑謂之曰不意渭陽翻成梟獍琳之以袖障面使人害之故人懼罪無敢至者唯英皎及董僧慧號哭盡哀為之喪殯

王思遠為建平王景素南徐州主簿深見禮遇景素被誅左右離散思遠親視殯葬手種松柏與廬江何昌寓沛郡劉璉上表理之事感朝廷景素女廢為庶人思遠分衣食以相資贍

梁庾於陵為齊隨王子隆荊州主簿子隆尋為明帝所

害僚吏畏避莫有至者唯於陵獨留

陸閑者襄之父也為始安王遙光揚州治中遙光之據東府作亂或勸閑去之閑曰吾為人吏何所逃死臺軍攻陷城閑見執將刑第二子絳求代死不獲遂以身蔽刃刑者俱害之

徐摛為太子左衛率太清末侯景攻陷臺城時簡文居永福省賊眾奔入舉兵上殿侍衛奔散莫有存者摛疑然侍立不動徐謂景曰侯公當以禮見何得如此凶威

遂折侯景令拜由是景嘗憚搗帝嗣位進授左衛將軍  
固辭不拜帝後被幽閉搗不獲朝因感氣疾而卒

嚴植之仕齊為廣漢王國右常侍王誅國人莫敢視植  
之獨奔哭手營殯殮徒跣送喪墓所為起冢葬畢乃還  
當時義之

陳蕭允初仕梁為太子洗馬侯景攻陷臺城百僚奔散  
允獨整衣冠坐於宮坊景軍敬焉弗之逼也

司馬暉仕梁為太子庶子江陵陷隨例入關而梁室屠

戮太子瘞殞失所嵩以宮臣乃抗表周朝求還江陵改葬辭甚酸切周朝優詔答曰昔主父從戮孔車有長者之風彭越就誅樂布得陪臣之禮庶子鄉國已改猶懷送往之情始驗忠貞方知臣道即敕荊州以禮安厝

顧越文帝時為黃門侍郎東宮皇太子嘗虛已禮接越以宮僚未盡時彥且太子仁弱宣帝有奪宗之兆內懷憤激乃上疏曰臣梁世薄官祿不代耕季年板蕩竄身窮谷幸屬聖期得逢昌運朝廷以臣微涉藝學遠垂徵

引擢臣以貴任資臣以厚秩二宮恩遇有異凡流木石  
知感犬馬識養臣獨何人固懷報德伏惟皇太子天下  
之本養善春宮臣陪侍經籍於今五載如愚所見多有  
曠官輔弼丞凝未極時選至於文宗學府廉潔正人當  
趨奉龍樓晨遊夕論恒聞前聖格言往賢正道如此則  
非僻之語無從而入臣年事侵迫非有邀求正是懷此  
不言則為有負明聖敢奏狂瞽願留中不泄疏奏帝深  
感焉而竟不能改革



殷不佞為太子通事舍人及文帝晏駕廢帝嗣位高宗  
為太傅錄尚書輔政甚為朝望所歸不佞素以名節自  
立又受委東宮乃與僕射到仲舉中書舍人劉師知尚  
書右丞王暹等謀矯詔出高宗衆人猶豫未敢先發不  
佞乃馳詣相府面宣勅令相王還第及事發仲舉等皆  
伏誅高宗雅重不佞特赦之免其官而已

後魏王雒兒明元在東宮時給事帳下帝嘗獵於灑南

灑水名  
在雁門

乘冰而濟冰陷沒馬雒兒投水奉帝出岸水沒

雒兒殆將凍死帝解衣以賜之自是恩寵日隆元紹之

逆帝左右唯雒兒與帳下師車路頭而已

路頭少以忠厚選給東宮

晝居山嶺夜還雒兒家雒兒隣人李道潛相奉給晨復還山衆庶頗知喜而相告紹聞收道斬之雒兒猶冒難往還京都通問於大臣大臣遂出奉迎百姓奔赴明元還宮社稷獲又雒兒有功焉

韓子熙為清河王懌常侍遷郎中令及領軍元入害懌久不得葬子熙為之憂悴屏處田野每言王若不得復

封以禮遷葬誓以終身不仕後靈太后反政以元乂為尚書令解其領軍子熙與懌中大夫劉定興學官令傅靈擿賓客張子慎伏闕上書曰竊惟故主太傅清河王職綜樞衡位居論道盡忠貞以奉公竭心膂以事國自先皇晏駕陛下冲幼負辰當朝義同分陝宋維反常小子性若青蠅汙白點黑讒佞是務以元乂皇姨之壻權勢攸歸遂相附託規求榮利共結圖謀坐生眉眼誣告國王枉以大逆賴明明在上赫赫臨下泥漬自消玉質

還潔謹案律文諸告事不實以其罪罪之維追無罪出  
為大郡刑賞僭差朝野怪愕若非宋維與又為計豈得  
全其身命方撫千里王以權在寵家塵謗紛雜恭慎之  
心逾深逾厲去其本宅移住殿西闔門靜守親賓阻絕  
于時吏部詔稟劉騰奏其弟官郡戍兼補及經內呈為  
王駁退騰由此生嫌私深怨怒遂乃擅廢太后離隔二  
宮掠拷胡定誣王行毒含齒戴髮莫不悲惋及會公卿  
議王之罪莫不俛眉飲氣唯諾是從僕射游肇亢言厲

氣發憤成疾為王致死王之忠誠歎篤節義純貞非但  
蘊藏胃襟實乃形於文翰披括史傳撰顯忠錄區目十  
篇分卷二十既欲彰忠心於萬代豈可為逆亂於一朝  
乞追遺志足明丹款入藉寵姻戚恃握兵馬無君之心  
實懷皂白擅廢太后枉害國王生殺之柄不由陛下賞  
罰之詔一出於人名藩重地皆其親黨京官要任必其  
心腹中山王熙本興義兵不圖神器戮其大逆合門滅  
盡遂令元略南奔為國巨患奚康生國之猛將盡忠棄

市其餘枉被屠戮者不可勝數緣此普天喪氣匝地憤  
傷致使朔隴猖狂歷歲為亂荆徐蠢動職是之繇昔趙  
高秉秦令關東鼎沸今元又執權使四方雲擾自古及  
今竹帛所載賊子亂臣莫此為甚開逆之始起自宋維  
成禍之末良由騰矣而令逆徒姦黨迭相樹置高官厚  
祿任情自取非但臣等痛恨終身抑為聖朝懷慚負愧  
以臣赤心悽悽之見又宜臬諸兩觀洿其舍廬騰合斲  
棺斬骸沉其五族上謝天人幽隔之憤下報忠臣冤酷

之痛方乃崇亞三事委以樞端所謂虎也更傳其翼朝  
野切齒遐邇扼腕蔓草難除去之宜盡厯觀曠代緬追  
振古當斷不斷其禍更生况又猜忍更居衡要臣中宵  
永歎竊以寒心實願宸鑒早為之所臣等潛伏閭閻於  
茲六載旦號白日夕泣星辰叩地寂寥呼天無響衛野  
納肝秦庭夜哭千古之痛何足相比今幸遇陛下睿聖  
親鑒萬幾太后仁明更撫四海臣等敢詣闕披陳乞報  
寃毒書奏靈太后義之乃引子熙為舍人後遂剖騰棺

賜人死

北齊魏收為太子少傅文宣每以酣宴之次云太子性懦宗社事重終當傳位常山收謂楊愔曰古人云太子國之根本不可動搖至尊三爵後每言傳位常山令臣下疑貳若實便須決行此言非戲魏收既忝師傅正當守之以死但恐國家不安惜以收言奏帝自此便止孫靈暉為南陽王綽師綽死後每至七日至於百日靈暉嘗為請僧設齋轉經行道



隋姚最為蜀王秀友秀鎮益州遷秀府司馬秀後陰有異謀文帝令公卿窮治其事開府慶整郝偉等並推過於秀最獨曰凡有不法皆最所為王實不知也榜訊數百卒無異詞竟坐誅論者義之

王延為秦王俊府將性忠厚領親信兵十餘年俊甚禮之及俊有疾嘗在閣下衣不解帶俊堯勺飲不入口者數日羸頓骨立文帝聞而憫之賜以御藥授驃騎將軍典宿衛俊葬之日延號慟而絕帝歎異之令通事舍人

弔祭焉詔葬延於俊側

唐李綱初仕周為齊王憲叅軍宣帝將害憲召僚屬證  
成其罪綱誓之以死終無撓辭

姚思廉初仕隋為代王侍讀屬義師平京城府寮駭散  
唯思廉侍王不離其側大言曰義師本扶王室卿等不  
宜無禮於王眾服其言於是布列階下須臾太宗至聞  
而義之許其扶匍至順陽閣下泣拜而去觀者咸歎曰  
忠烈之士也仁者有勇此之謂乎太宗居藩引為文學

及親征徐圓郎思廉時在雒陽太宗嘗從容言及隋亡  
之事慨然曰姚思廉不懼兵刃以明大節求諸古人亦  
何以加也因寄物百段遺其書曰想卿節義之風故有  
斯贈後為文學館學士寫其形像列於十八學士圖今  
文學褚亮為之贊曰志苦精勤紀言實錄臨危殉義餘  
風厲俗

王珪為太子中允劉黑闥反珪及魏徵謂太子建成曰  
殿下但以地居嫡長爰踐元良功績既無可稱仁聲又

未遐布而秦王勲業克隆威震四海人心所向殿下何以自安今黑闥率破亡之餘衆不盈萬加以糧運阻絕瘡痍未瘳若大軍一臨可一戰而擒也願請討之且以立功深自封植因結山東英俊建成從其計遂請討劉黑闥擒之而旋

張公謹個儻好奇略太宗引入幕府時太宗功德甚隆每為建成元吉之所譖毀因召公謹訪以自安之術對甚合旨未見親遇及建成將為亂公謹與長孫無忌等

九人奉太宗於玄武門以討亂其黨來犯玄武門公謹  
閉門以拒之以功累轉左武侯將軍封定遠縣公邑二  
千戶別食一千戶

魏徵為隱太子洗馬甚禮之徵見太宗勲業日隆每勸  
建成早為之所及敗太宗使召之謂曰汝離間我兄弟  
何也徵曰皇太子若從徵言必無今日之禍太宗素器  
之引為詹事主簿

尉遲敬德為秦王府副護兵隱太子巢刺王之有異謀

也乃致書於敬德贈以金銀器物一車敬德拒之不受因以啟聞太宗謂曰公之素心鬱如山岳積金以至斗極未能動公之情何須慮也元吉等深忌之乃令壯士往刺敬德覺之終不能害乃譖敬德於高祖囚之於大理并拘其親屬訊驗無狀然後得釋會突厥侵擾河西建威與元吉為將西討相與陰謀請太宗同送於昆明池因欲肆其凶逆敬德既聞其謀遽啟其事且曰大王若不速正之則恐被其圖害然後社稷危矣太宗嘆而言曰

如公之言寡人實有茲慮然一旦倉卒具若在上驚動  
何其若骨肉痛傷何同懷之情終所不忍時房玄齡杜  
如晦皆被斥在外不得復入太宗密令長孫無忌召之  
玄齡等報曰有敕不許更得事王今若私謁必至誅滅  
不敢奉命太宗大怒謂敬德曰玄齡如晦召之不來果  
背我也乃取所佩刀以授敬德曰以賜公且往觀玄齡  
等意若無來意且斬其首以進也玄齡聞之惶懼因隨  
敬德服道士衣以謁敬德朝夕進勸太宗猶豫未決敬

德固諍十返然後計定二凶既誅高祖汎舟海池太宗乃令敬德身住侍衛高祖意乃安於是賜以珍物敬德並辭而不受事平之後授太子左衛率

段志玄大業末隨父在太原義兵起志玄召募得千餘人投軍頭從太宗後轉右護軍隱太子及齊王元吉競以金帛誘之志玄拒而不顧每以白太宗及即位遷左驍衛大將軍

程知節為秦王府左三統軍為隱太子所忌構之於高



祖除康州刺史知節白太宗曰大王手臂今並剪除身  
必不久知節以死不去願速自全遂從討建成元吉事  
定拜太子右衛率

薛萬徹為車騎將軍封武安縣公隱太子建成引置左  
右建成被誅萬徹率官兵戰於玄武門鼓譟將入秦府  
將士大懼乃以建成首示之萬徹以十餘騎亡於終南  
山太宗累遣使諭意萬徹釋仗而來太宗以其忠於所  
事不之罪也

李安嚴與隱太子同取鄭氏因事東宮及建成敗率兵拒戰太宗以為忠於所事故漸任用之

謝叔方事巢刺王元吉數有戰功元吉與隱太子作亂太宗討逆於玄武門叔方率府兵與東宮率馮立合軍拒戰於北闕下殺屯雲將軍敬君引中郎將呂衡俄而尉遲敬德傳元吉首以示之叔方號哭而遁明日出首太宗曰義士也命釋之

李義琰為太子右庶子章懷太子之廢也高宗慰勉官

僚盡捨罪令復其位薛元超等皆舞蹈謝恩義琰獨引  
罪涕泣時論美之

李安仁為太子右庶子顯慶元年皇太子忠既廢黜官  
僚皆懼罪亡匿無敢見者安仁獨候忠涕泣拜辭而去  
時論美之

昵狎

夫出入承華游從博望皆調護斯屬羽儀攸寄者也固  
當敦厚為德教導是先具有怠棄典禮昵狎元良追隨

禁園之中羣言罔恤陪侍杯筵之右酣飲過差近失師  
資遠貽譏謗豈足以增前星之元彩繼南山之軌躅焉  
漢昌邑王賀從官騶宰奴二百餘人嘗與居禁園內教  
戲

魏劉楨字公幹為文帝五官將文學與王粲等並見友  
善帝嘗賜楨廓落帶其後師死欲借取以為像因書嘲  
楨云夫物因人為貴故在賤者之手不御至尊之側今  
雖取之勿嫌其不反也楨答曰楨聞荆山之璞曜元后

之寶隋侯之珠燭庶士之好南垠之金登窈窕之首麗  
貂之尾綴侍臣之幘此四寶者伏朽石之下潛淤泥之  
中而揚光千載之上發彩疇昔之外亦皆未能初自接  
於至尊也夫尊者所服卑者所修也貴者所御賤者所  
先也故厦屋初成而大匠先立其下嘉禾始熟而農夫  
先嘗其粒楨所帶無他妙飾若實殊異尚可納也楨辭  
旨巧妙皆如是繇是特為諸公子所親愛其後太子嘗  
請諸文學酒酣坐歡命夫人甄氏出拜坐中眾人咸伏

而楨獨平視太祖聞之乃收楨減死輸作

吳質文帝初為五官將時質以才學通博為五官將及諸侯所禮及即位嘗召質及曹休歡會命郭后出見質等曰卿諦視之其親昵如此

晉殷仲堪能清言善屬文孝武為太子召為中庶子甚相親愛

陳江總為太子詹事共太子為長夜之飲養良娣陳氏為女太子微行遊總家宣帝怒而免之

後魏盧內領太保錄尚書事魯元之少子內給侍東宮  
恭宗深暱之嘗與臥起同衣父子有寵兩宮勢傾天下  
郭祚領太子少師孝明在東宮幼弱祚嘗隨宣武幸東  
宮懷一黃畝出奉太子時應詔左右趙桃弓及祚皆私  
狎之時人謂之桃弓僕射黃畝少師

北齊和士開為長廣王府參軍王性好握槊士開善於  
此戲繇是遂有此舉加以傾巧便辟又能彈胡琵琶因  
此親狎嘗謂王曰殿下非天人也是天帝也王曰卿非

世人也是世神也其深相愛重如此又宣知其輕薄不欲令王與小人相親善責其戲狎過度徙之馬城

隋鄭譯任周為太子宫尹坐褻狎皇太子武帝大怒除名為民太子復召之譯戲狎如初因言於太子曰殿下何時可得據天下太子悅而益昵之

唐令則為太子左庶子太子勇昵狎之每令以絃歌教內人時劉行本亦為左庶子責之曰庶子當輔太子以正道何有嬖昵房帷之間哉令則甚慚而不能改又太



子歲首宴宮臣令則自請奏琵琶又歌武媚娘之曲洗  
馬李綱白太子曰令則身任宮卿職當調護乃於宴坐  
自比優倡進淫聲以穢視聽事若上聞罪在不測豈不  
累於殿下臣請正其罪勇曰我欲為樂耳君勿多事綱  
趨而出

夏侯福為太子左衛率長史為太子勇所昵嘗於閣內  
與太子戲福大笑聲聞於外左庶子劉行本時在閣下  
聞之待其出行本數之曰殿下寬容賜汝顏色汝何物

小人敢為褻慢因付執法者治之數日太子為福致請  
乃釋

劉臻為太子勇東宮學士甚褻狎之

柳詵為晉王諮議叅軍王為太子引詵為東宮學士加  
通直散騎常侍檢校洗馬甚見親待每名入臥內與之  
宴詵詵尤俊辯多在侍從有所顧問答應如響性又嗜  
酒言雜俳諧繇是彌為太子所親狎

唐楊璩中宗世為秘書監太常卿武崇訓並檢校太子

賓客在職不能讜言正議以申調護之禮唯以打毬猥戲取媚於太子故大為時論所譏

罪譴

夫任處儲官職叅王府自非才行優著藝術精明故不可以贊於重離資於磐石若乃失調護之方忘輔導之訓忠言不發善道靡彰昵狎小人陰圖非望以至自貽官謗坐速刑章者不亦宜乎

漢公孫詭為梁孝王中尉初景帝廢栗太子太后心欲

以梁王為嗣大臣及袁盎等有所開說於帝太后議格

音閭梁王怨袁盎及議臣乃與詭及羊勝之屬謀陰使人

刺殺盎及他議臣十餘人賊未得也於是天子意梁意疑

也逐賊果梁使之遣使冠蓋相望於道覆案梁事捕公

孫詭羊勝皆匿王後宮使者責二千石急梁相軒丘豹

姓軒丘名豹及內史安國即韓安國皆泣諫王王乃令勝詭皆自

殺出之

枚臯為梁恭王郎恭王名賈孝王子也三年為王使與冗從事冗

散職之從王者也

見讒惡過罪

惡謂宄從言其短惡之事

室家没入官臯亡

至長安會赦

許廣漢為昌邑王郎從武帝上甘泉誤取他郎鞍以被其馬發覺吏劾從行而盜當死有詔募下蠶

死罪囚欲就宮者聽

之

王式為昌邑王師為王廢式繫獄當死治事使者責問曰師何以亡諫書式對曰臣以詩三百五篇朝夕授王至於忠臣孝子之篇未嘗不為王反復誦之也

復方至六切

於危亡失道之君未嘗不流涕為王深陳之也臣以三百五篇諫是以亡諫書使者以聞亦得減死論

王吉為昌邑王賀中尉後賀即位二十餘日以行淫亂廢昌邑羣臣坐在國時不舉奏王罪過令漢朝不聞知

又不能輔道陷王大惡

道讀曰導

皆下獄誅唯吉與郎中令

龔遂忠直數諫正得減死髡為城旦

後漢楚王英既以不道廢徙丹陽涇縣乃悉出楚官屬

無辭語者

師遷為陳愍王寵國相靈帝熹平二年遷奏前相魏悛  
與寵共祭天神希幸非冀罪至不道有司奏遣使者案  
驗詔檻車傳送悛詣北寺詔獄使中常侍王酺一作王甫與  
尚書令侍御史雜考悛辭與王共祭黃老君求長生福  
而已無他冀幸酺等奏悛職在規正而所為不端遷誣  
告其王固以不道皆誅死有詔赦寵不案

魏楚王彪有罪自殺彪之官屬以下及監國謁者坐知情無輔導之義皆伏誅

晉江統為太子洗馬太子奢費過度統上書諫及太子廢徙許昌

南齊張充為武陵王友坐書與尚書令王儉辟旨激揚御史中丞到搗所奏免官禁錮論者以為有恨於儉也梁王僧孺高祖天監中為南康王長史行府州國事王典籤湯道愍暱于王用事府內僧孺每裁抑之道愍遂謗訟僧孺逮詣南司奉牋辭府曰下官不能避溺山隅而正冠李下既貽疵辱方致徽繩解籙收箬且歸初服



竊以董生偉器止相驕王賈子上才爰傳卑土下官生  
年有值謬仰清塵假翼西雍竊步東閣多慙衽服取亂  
長裾高榻相望直居坐右長階如畫獨在僚端借其從  
容之詞假以寬和之色恩禮遠過申白榮望多廁應徐  
厚德難逢小人易悅方謂離腸隕首不足以報一言露  
膽披誠何能以酬屢顧寧謂爵羅裁舉微禽先落闔闔  
始吹細草仍墜一辭九畹方去五雲縱天網是漏聖恩  
可恃亦復孰寄心骸何施眉目方當橫潭亂海就魚鼈

而為羣披榛捫樹從虺蛇而相伍豈復仰聽金聲式瞻  
玉色顧步高軒悲如霰委踟躕下席淚若綆縻僧孺生  
免官

後魏馮誕為太子太師孝文謂其無師傅獎道風誕深  
自悔責

游肇為中庶子孝文謂曰自建承華已經一稔然東宮  
之官無直言之士雖未經三載事須考黜肇及中舍人  
李平識學可觀可為中庶子安樂王詮可為下中解東

華之任退員外散騎常侍馮夙可為下下免中庶子免  
爵兩任員外常侍如故中舍人閻賢保可為下下退為  
武騎都尉

隋韋世約高祖開皇中為太子洗馬兄冲為南寧州總  
管士卒縱暴益州長史元巖治其事無所寬貸世約譖  
巖於皇太子帝謂太子曰古人有沽酒酸而不售者為  
噬犬耳今何用世約乎適累汝也世約遂除名  
柳肅開皇中為太子僕射太子廢坐除名為民

柳謩之煬帝大業中為齊王長史王擅寵左右放縱喬  
令則之徒深見昵狎謩之雖知其罪失不能輔正及王  
得罪謩之竟坐除名

唐韋挺高祖武德中為太子左衛驃騎檢校左衛率隱  
太子恩遇甚隆宮臣罕與為比會有上事者稱挺得幸  
於隱太子構扇異端帝訊之有狀與王珪等同流於越  
雋

王珪武德中為太子中允為隱太子所禮後以連及陰

謀事流於雋州

杜正倫太宗貞觀中為中書侍郎兼太子左庶子時太子承乾有足疾不能朝謁好昵近羣小太宗謂正倫曰我兒疾病乃可事也但全無令譽不聞愛賢好善私相引接多是小人卿可察之若教示不得須來告我正倫數諫不納乃以太宗語告之承乾抗表聞奏太宗謂正倫曰何故漏泄我語對曰訓導不入故以陛下語嚇之冀其有懼或當反善帝怒出為穀州刺史

薛大鼎貞觀中為齊王祐長史祐溺情羣小大鼎屢諫  
不聽太宗以鼎輔導無方竟坐免而以權萬紀代之  
張玄素貞觀中為太子左庶子趙智引令狐德棻為右  
庶子濮王仁表家令崔知機並以材選用太子承乾既  
敗太宗引大義以讓之皆免為庶人

王勃高宗乾封初上東岳頌及乾元殿頌沛王賢奏就  
府修撰時諸王以鬪難為戲勃作檄英王難文高宗聞  
之曰迴車朝歌不踐勝母者惡其名也勃之此文恐成

交構之漸斥勃不令入府

蓋文達為蜀王師坐王非法免

蕭嵩玄宗開元中為太子太師嘗以城南別業遺宦者  
牛仙童仙童得罪嵩坐交通小人出為青州刺史

令狐峘初為衡州刺史李泌輔政召拜右庶子修史無  
何泌卒竇叅秉政惡其為人貶吉州刺史

蘇弁為太子詹事初入朝班位失序殿中侍御史鄒儒  
立對仗彈之弁於金吾待罪數刻特釋舊制太子詹事

班次太常宗正卿之下貞元三年御史中丞竇叅叙定  
班位移詹事在河南太原尹之下弁乃引舊班制立臺  
官詰之仍紿云已白宰相請依舊故為儒立彈之

韋綬憲宗元和中為諫議大夫充皇太子侍讀綬好諧  
戲兼通人間小說太子因侍或以綬所譚言之他日帝  
謂宰臣曰侍讀者當以經術輔導太子使深知其君臣  
父子之教今或聞綬之談論有異於是豈導太子者因  
命罷其職尋又出之



白居易元和中為太子左贊善大夫先是居易母因看  
花墜井死時居易作賞花及新井詩名教之士譏焉或  
以其事上言因命宰臣與居易遠州刺史中書舍人王  
淮上言居易所坐事跡不合理郡乃授江州司馬

後唐司徒詡為戶部員外郎秦王從榮之開府也朝廷  
以詡充河南府判官王之遇害例貶寧州尋移相州司  
馬

冊府元龜卷七百十五

欽定四庫全書

子部

冊府元龜卷七百十六

七

詳校官中書臣吳瓌

侍讀臣孫球覆勘

總校官庶吉士臣何思鈞

校對官典簿臣劉景岳

謄錄監生臣沈元銳

欽定四庫全書

冊府元龜卷七百十六 宋

王欽若等 撰

幕府部

總序

周禮六官六軍並有吏屬大則命於朝廷次則皆自辟除春秋諸國有軍司馬尉侯之職而未有幕府之名戰國之際始謂將帥所治為幕府秦分天下為郡屬官有丞邊郡有長史主兵漢丞相三公開府置掾史司隸刺

史有從事史佐京尹守相有掾史曹屬皆幕府之職也

文帝二年丞相府置兩長史秩千石武帝時有三長史

又分丞相長史為兩府

三長史蓋有守者非正員故也至劉屈氂為相始分丞相長史

為兩府

元狩五年初置丞相司直比二千石掌佐丞相舉

不法其餘察屬之職逮於中興名次大備太傅太尉司

空府皆有長史一人掾屬令史御屬各有差

太傅掾屬二十四人

令御史屬三十二人太尉掾屬同太傅加置令史御屬一人司徒皆置掾屬八人令史御屬十三人司空減司

徒掾屬二人加置令史御屬八人正曰掾副曰屬

長史掌署諸曹事掾史屬則西

曹主府史署用東曹主二千石長史遷除及軍吏戶曹  
主民戶祠祀農桑奏曹主奏議辭曹主辭訟法曹主郵  
驛科程尉曹主卒徒轉運賊曹主盜賊決曹主罪法兵  
曹主兵金曹主貨幣鹽鐵倉曹主倉穀令史則有閣下  
令史主閣下威儀記室令史主上章表報書記門下令  
史主府門其餘令史各典曹文書御屬主為公御職如  
錄事太尉府別有黃閣主簿錄省衆事司空別有橋道  
掾主橋道大將軍驃騎將軍府有司馬一人從事中郎

二人長史掾屬同司空府令史御屬減司空府五人騎  
衛將軍無長史司馬又減大將軍掾屬九人御屬六人  
別有部集一人總知營事兵曹掾史主兵器稟假  
掾史主稟假禁司外刺刺姦主罪法皆無員其領兵外討  
則營有五部部置校尉軍司馬各一人部有曲曲置軍  
候一人曲有屯屯置長一人若不置校尉則部但有軍  
司馬假軍候其別部則有別部司馬其餘將軍置以征  
伐者則府無員職惟有部曲司馬軍候以領兵其城門

屯騎越騎步兵胡騎射聲等校尉各有司馬一人主兵  
使匈奴郎將護羌護烏桓等校尉皆置從事二人有事  
隨事置掾因而為員司隸校尉有從事史二十人假佐  
二十五人都官功曹別駕簿曹兵曹等從事主簿門亭  
長功曹書佐經師月令師律令師簿曹都官等書佐皆  
無員所部郡國各有從事書佐一人刺史省都官從事  
改功曹從事為治中從事餘官同司隸河南京兆等尹  
有掾史五人四部督郵吏部掾二十六人案獄仁恕掾

三人監津渠漕水掾二十五人卒吏二百五十人文學

守助掾六十人書佐五十人循行二百三十人幹小史二百

三十一人郡守官屬有掾史督卸倉功等曹史不備載其職光武建

武中置司徒司直尋省又罷邊郡丞以長史領職明帝

增驃騎將軍長史掾史員為四十人四府長史掾史皆無四十八人東平王

蒼為驃騎明帝特置四十人以優之和帝時竇憲為車騎將軍置官屬如

司空府又置中護軍一人與參謀議安帝置右扶風都

尉京兆虎牙都尉皆置諸曹掾史畧如公府無東西曹



有功曹史主選署功勞五官掾署功曹及諸曹事五部督郵

曹掾主監屬縣亭長主正門記室史主錄記書催期會無令

史閣下及諸曹各有佐幹主文書桓帝元嘉二年置禮儀

大將軍增掾屬令史置舍人各十人時以梁冀為禮儀大將軍靈帝

時以九卿出為州牧太常劉焉為益州宗正劉虞為幽州太僕黃琬為豫州其任漸

重官屬有別駕從事史主財穀簿書兵曹從事史主兵

事主簿錄閣下眾事省署文書門亭長主州正門功曹書佐

主選用孝經師主監試經月令師主時節祭祀律令師平

律簿曹佐主簿書各一人部郡從事史主察非法典郡書佐主一郡文書每郡各一人獻帝建安十二年置中護中軍領軍各有長史司馬員魏武帝為丞相置左右長史各一人徵事二人省西曹掾是時三國鼎峙官府吏屬各因漢制加有正行叅軍行叅軍員後晉景帝為魏大將軍置東西戶倉賊金水兵騎兵等曹掾各一人不置屬文帝為相國府官置中衛驍衛二將軍左右長史司馬從事中郎主簿各四人舍人十九人叅軍二

十二人參戰十一人後復置左右戶賊金水兵等曹屬各一人倉曹屬二人增置鎧集法奏等曹掾屬各一人

士馬媒等曹屬各一人散屬九人晉初諸公開府位從

公驃騎車騎衛將軍伏波撫軍都軍護鎮中軍四征四鎮龍驤典軍上軍輔國等大將軍左右光祿光祿三

大夫開府者皆為位從公長史一人西東閣祭酒西東曹掾戶倉賊

曹令史屬各一人御屬閣下令史西東倉戶賊等曹令史門令史記室省事令史閣下記室書令史西東曹學事各一人司徒加置左右長史各一人主簿左西曹掾

屬各一人改西曹為右西曹司空加置橋道掾一人其  
加兵者增置司馬一人從事中郎二人主簿記室督掾  
各一人舍人四人兵鎧士曹營軍刺姦帳下都督外都  
督令史各一人為持節都督者增參軍六人驃騎以下  
及大將軍不開府非持節都督及三品將軍者置長史  
司馬各一人主簿功曹史門下督錄事兵鎧士賊曹營  
軍刺姦帳下都督功曹書佐門下書史各一人州刺史  
置別駕治中從事主簿門亭長錄事記室書佐諸曹佐

守從事武猛從事都水從事等吏四十一人所領郡各

置部從事一人邊州又置弓馬從事五十餘人徐州別

置淮海從事涼州別置河津從事荊州別置監佃督各

一人涼益州又加置吏員八十五人郡置主簿主記室

門下賊曹議生門下史記室史錄事史書佐門下書佐

循行幹小史五官掾功曹書佐循行小史五官掾文學

掾等員

河南郡京師所在則置尹王國以內史掌太守事其吏屬並同凡郡國戶減五千者職五十人

散吏十三人五千以上加職吏十三人散吏八人萬戶以上又加職吏六人散吏十八人武帝初置

左右衛將軍亦有長史司馬功曹主簿員後安平獻王  
字為太宰而分府兵鎧士營軍刺姦五曹增置屬楊駿  
為太傅又增祭酒為四人分兵曹為左右法金田集水  
戎車馬等曹皆置屬趙王倫為相國置左右長史司馬  
從事中郎四人叅軍二十人主簿記室督祭酒各四人  
東西曹又置屬餘十八曹加置掾諸曹又皆置御屬令  
史學幹等員東海王越為丞相府又置行叅軍兼行叅  
軍元帝初為鎮東將軍置錄事叅軍為丞相置從事中

郎分掌諸曹有錄事度支三兵等中郎以諮議叅軍主  
諷議事有錄事記室東西度支戶法金倉理中兵外兵  
騎兵典兵兵賊運禁防典賓鎧田士騎士車直兵長流  
刑獄城局水右戶墨等曹其后公府止置長史倉曹掾  
戶曹屬東西閣祭酒各一人主簿舍人二人御屬二人  
令史無定員領兵者置司馬一人從事中郎二人叅軍  
無定員加崇者置左右長史司馬從事中郎四人掾屬  
四人增置倉曹屬戶曹掾領兵者又置軍諮祭酒叅軍

督護以領兵中護中軍領軍府增置功曹主簿出征則

置叅軍

時又有長兼叅軍除拜則為叅軍事  
府版則為行叅軍又為版行叅軍

五校亦置

司馬功曹主簿員後省

五校屯騎步兵越騎  
長水射聲校尉也

又罷左右

衛將軍長史員成帝咸康中置江州別駕祭酒省諸郡

丞宋高祖為相止置諮議錄事記室戶倉外兵騎兵長

流賊刑獄城局法田水鎧士集右戶墨等曹叅軍皆無

員合中兵直兵置一叅軍曹仍舊為二自後公府皆循

其制而小府省長流叅軍置禁防叅軍諸府叅軍督護



罷領軍兵騎將軍以下為刺史都督儀同三司者置官屬  
並如公府都督不帶儀同者不置從事中郎置公曹一人  
主吏在主簿上刺史則有別駕從事史治中從事從主簿  
西曹書佐祭酒從事史議曹從事史部郡從事史揚州無  
祭酒以主簿治事荊州別有從事史廣州徐州別有月令  
從事豫州別有長史叅軍別駕西曹主吏及選事西曹  
郎漢之功曹也治中主  
衆曹文書祭酒  
分掌諸曹事郡屬卒因前制文帝元嘉四年定置郡  
官略如公府無東西曹史主選舉五官掾主諸

曹部縣有都御門亭長主記史催督期會齊州郡之職亦循前制三公府置左右長史左西曹掾屬主簿祭酒令史從事中郎倉曹掾戶曹屬東西閣祭酒主簿舍人御屬等員加崇者長史以下並增員數大將軍位從公開府儀同等府置左長史司馬各一人詔議以下叅軍並同宋公府而城局以上曹署正叅軍法以下曹署行叅軍無曹職為專兼員梁諸公大將軍大司馬等府置長史司馬詔議叅軍掾屬從事中郎記室主簿列曹叅

軍行叅軍舍人等員司徒府則有左右長史左西曹掾  
州別有文學從事郡官仍舊陳庶姓公府置諮議叅軍  
長史司馬從事中郎掾屬府中錄事記室直兵參軍板中  
錄事記室直兵參軍主簿祭酒參軍等員庶姓持節府省  
從事中郎叅軍別置功曹史餘同公府庶姓非公不持  
節將軍止置長史主簿安蠻戎越校尉中郎將止置長  
史司馬正員之外皆有版授官自餘州郡之吏皆循梁  
制後魏起於代北庶職草創道武皇始元年初令州郡

定置刺史太守而察屬未著至大和定令官制始詳三公大將軍府有司馬長史元士諮議叅軍主簿從事中郎叅軍行記室督掾屬舍人御屬令史閣下令史又有錄事叅軍事功曹記室戶倉中兵叅軍事叅軍事列曹行叅軍行叅軍長兼行叅軍叅軍都督開府置長史從事中郎諮議叅軍正叅軍主簿行叅軍記室督令史一品二品三品正從將軍開府別有功曹史無元士記室督掾屬舍人御屬令史其長史諮議錄事及諸叅軍督

護員並如公府四品五品正從將軍止置長史司馬主簿列曹叅軍列曹行叅軍中軍鎮軍撫軍有長史司馬中散行叅軍校督州有別駕功曹都官司事從事錄事從事史治中從事史主簿議曹從事史郡有功曹主簿通事等員宣武永平二年併省諸州諮議記室戶刑獄田水集士等曹叅軍孝莊初增大丞相太宰佐史時以爾朱榮為大丞相元天穆為太宰孝靜天平中置京畿大都督立府置佐而史闕其職後齊立大三公府無元士分戶曹為左右

加置外兵騎兵長流城局刑獄等曹叅軍事東西閣祭  
酒法墨田水鎧集士等曹行叅軍餘並如後魏制司徒  
府加左右長史三公以下儀同三司開府者減記室倉  
城局田水鎧士等曹各一人領軍中領軍護軍中護軍  
府皆有長史司馬功曹主簿錄事等員其領軍府所領  
左右衛左右護軍府所領東西南北四中郎將府各減  
功曹錄事員而郎將府加置錄事叅軍統府錄事直兵  
功倉中兵外兵騎兵長流城局等叅軍法田鎧曹行叅

軍司府牧置別駕從事史治中從事史州都主簿西曹

書佐記室戶功金租兵騎等曹都官法部郡等從事

主簿

置史西曹以下各置掾史清都郡置丞中正功曹主簿都御五官門

下督錄事主記議生功曹記室戶田金租兵騎賊法等

曹掾中部掾州刺史屬官有長史司馬錄事功倉中兵

等曹叅軍事及掾史主簿及掾記室掾史外兵騎兵長

流城局刑獄等叅軍叅軍事及掾史叅軍事法墨田鎡

集士等曹行叅軍及掾史左戶掾史行叅軍長兼叅軍

叅軍督護統府直兵箱錄事等員州屬官有別駕從事

史治中從事史州都先迎主簿主簿西曹佐月令史祭

酒從事史都郡從事早服從事典籤及史門下督省事

都錄事及史箱錄事史朝直刺姦記室戶田金租兵左

戶等掾史

上上州刺史府及州屬官佐吏共三百九十人上中上下州各差減十人中上州又減

五十一人中中下州又差減十人下上州又減五十人下中下州又差減十人郡太守屬官

有丞中正先迎功曹先迎主簿功曹主簿五官省事及

西戶金租兵集等曹掾佐太學博士助教太學生市長



倉督等員

上上郡太守官屬佐吏共二百十二人上中上下郡各差減五人中上又減四十五人中

中中下郡又減五人下上郡又減四十人下中下下郡又差減二人後周六官之制公府

有上大夫元士統軍驃騎車騎柱國大將軍四征中鎮  
撫諸將軍府有長史司馬司錄中郎掾屬列曹叅軍戍  
副等員別將開府有長史司馬司錄呼藥別駕侍中列  
曹叅軍等員隋三師不置府屬三公依後周置官寮而  
左右衛左右武衛左右武侯大將軍並有長史司馬錄  
事功倉兵騎曹叅軍法鎧曹行叅軍各一人行叅軍左

右衛武侯各六人武衛八人左右衛又各統親衛置開  
府儀同二府開府府官屬減功騎曹叅軍鎧曹行叅軍  
儀同府又減法曹行叅軍餘如左右衛左右領左右府  
屬同開府府左右監開府別有行叅軍四人餘官如左  
右府左右領軍府別有掾屬各一人明法四人加行叅  
軍十人餘官如左右衛後高祖又採後周之制置上柱  
國柱國上大將軍大將軍上開府儀同三司儀同三司  
上儀同三司儀同三司大都督帥都督總十一等上柱

國府長史司馬諮議叅軍事掾屬各一人功曹記室戶  
倉兵騎兵城局等曹叅軍事各一人叅軍事五人法田  
水鎧士等曹行叅軍各一人行叅軍十二人典籤二人  
柱國省騎兵叅軍事水曹行叅軍員減叅軍事行叅軍  
各一人上大將軍又省諮議叅軍事田鎧曹行叅軍員  
又減行叅軍一人大將軍又省掾屬員減叅軍事二人  
上開府又省法士曹行叅軍事叅軍事員開府又省典  
籤員減行叅軍二人上儀同又省功曹城局叅軍事員

又減行叅軍事三人儀同又省倉曹員減行叅軍二人  
又令三師三公置府佐與柱國同雍州牧置別駕贊務  
州都郡正主簿錄事西曹書佐金戶兵法士等曹從事  
部都從事武猛從事并佐史等員五百二十人京兆尹  
置丞正功曹主簿金戶兵法士等曹佐并佐史等員二  
百四十四人州刺史置長史司馬錄事功戶兵等曹叅  
軍法士曹行叅軍典籤州都光初主簿郡正主簿西曹  
書佐祭酒從事部郡從事倉督市令丞并佐史等員上

州三百二十三人上中州減十二人上下州又減十六人  
中上州又減二十九人中中中下州又差減二十人  
下上州又減十人下中州又  
減十五人下下州又減二人郡太守置丞尉正光初主

簿縣正功曹主簿西倉戶兵法士等官曹市令佐史等

員

上上郡一百四十六人上中郡減五人上下郡又減

又減五人下上郡又減十九人中中郡又減六人中下郡  
中郡又減五人下下郡又減六人開皇二年罷郡以州

統縣改別駕贊務為長史司馬罷辟署令史部除授品

官為州郡佐官四年一遷以曹為名者並改為司自漢

降府幕官都自辟署亦有朝命者梁魏以來州郡縣正  
以下皆州郡自調用理時事至是以為鄉官始以品官

總職

開皇十二年悉改諸州司從事為叅軍十五年盡罷州郡鄉官煬帝即位置十二衛將軍各有長史錄事司倉兵騎鎧等曹左右翊衛又有親侍鷹揚二府各有司馬長史兵倉曹左右侯衛別置察非掾二人罷州置郡罷長史司馬贊務一人置東西掾主簿司功倉戶兵法士等書佐各因郡之大小而為增減改行叅軍為行書佐其後諸郡又加置通守一人改贊務為丞位在通守下唐丞相之務歸於臺省三公無官屬改郡

為州仍置總管之職武德四年始改總管為都督府貞  
觀中分為二等大都督府有長史司馬錄事參軍錄事  
六曹參軍事各二員功士曹一員參軍事典獄間事丞  
佐史倉督等員有差中都督府別有別駕一人餘官並同大  
都督府上州中州刺史府官同中都督府下州刺史省  
長史餘與中州同其大都護府無別駕士曹及參軍事  
以下員上都督府又無法曹員餘同上州又因隋制置  
十二衛皆有衛佐

長史錄事倉兵騎等曹參軍司皆中  
侯司戈執戟奉車都尉等員龍朔二

年置左右羽林軍開元二十七年置左右龍武軍官屬同十二衛佐又有十六衛將軍正有長安史曹錄事校尉等則天長壽中有經畧使睿宗景雲後有節度使肅

宗至德後有觀察使明皇天寶後有團練防禦使節度使之屬有副使一人行軍司馬一人判官二人掌書記一人參謀無員隨軍四人觀察使有判官支使經畧使有判官等員其後節度觀察使防禦團練皆有推官巡官之職兼度支營田招討使者又有度支營田等判官自是正為幕府之職

自後上佐曹官皆為州縣之職更不復紀其有軍校若都虞侯都知



兵馬使之比有武功  
參軍謀者則附次焉  
皆奏請有出身人及六品以下正

員官為之惟兩省供奉尚書省御史臺見任郎官不得  
奏請其辟署未有官者皆謂之攝自從諸使兵馬留後  
兩京留守後置判官鹽鐵度支及場院使亦置判官推  
巡之職後唐莊宗同光二年令諸道節度副使兩使判  
官朝廷除授外幕不職吏皆委本道選任明宗天成二  
年又限諸藩鎮幕職不得兼錄事參軍鄴都管內諸州  
錄事參軍不得兼防禦判官始改刺史州防團練判官為

軍事判官晉高祖天福二年又限防禦團練刺史不得  
奏未有官人為從事漢乾祐元年又禁諸道不得奏薦  
行軍副使兩使判官周世宗顯德二年始令刺史州置  
軍士推官一員原其叅佐將幕裨贊公府承刺舉之職  
分守相之務而能左右宣力出入盡規潔素靡渝亮直  
是與建謀議而惟允集勲伐以居多竭乃忠誠膺其倚  
賴至於懿文秀茂明識淵粹承辟署之美膺棟梁之重  
及貪墨自恣回邪是圖憲法所罹罪釁連及並用論次

以倣方來凡幕府部一十六門

選任 倚任

選任

夫任官惟賢前經之不訓以能詔事三代之達道二漢之際始盛賓佐之選故辟署之命行焉施及鼎國興戎右武晉宋以降藩寄彌重其或誓師遣將建牙開府並建宗室出臨屏翰以至掌司留務委之腹心尊崇宰弼重其叅贊則必簡乎朝議精擇素望既咨其策畫亦賴

其傳導至乃取於近侍擬自高位豈非慎重大事貴經  
武之有功協比正人冀茂親之盛德者也

魏杜襲為太祖丞相長史從討漢中太祖東還當選留  
府長史鎮守長安主者所選多不當太祖令曰釋騏驎  
而不乘焉皇皇而更索遂以襲為留府長史駐關中

張緝為溫令會蜀相諸葛亮出緝上便宜詔以問中書  
令孫資資以為有籌畧遂召拜騎都尉遣叅征蜀軍

晉王舒為溧陽令明帝之為東中郎將妙選上佐以舒

為司馬轉後將軍宣城公褚裒諂議叅軍頻領望府咸稱明練

宋張邵為高祖揚州主簿世子始開征虜府以邵為錄事叅軍遷諂議叅軍領記室

張敷少整貴文韻端雅武帝聞其美召見竒之曰真千里駒也以為世子中軍叅軍

袁洵元嘉中累歷顯官廬陵王紹為南中郎將江州刺史少年未親政以洵為長史尋陽太守行府州事

張暢為尚書主客郎未拜除江夏王義恭征北記室參  
軍孝武鎮彭城暢為安北長史沛郡太守元嘉末暢履  
行盱眙城欲立大鎮時魏軍聲云當出襄陽故以暢為  
南譙王義宣司空長史

張永為右衛將軍免官時孝武寵子新安王子鸞為南  
徐州刺史割吳郡屬徐州起永為別駕從事史

南齊張融字思光吳人宋孝武間融有早譽解褐為新  
安王北中郎參軍

張岱初仕宋為撫軍諮議叅軍領山陰令時巴陵王休  
若為北徐州未親政事以岱為冠軍諮議叅軍領彭城  
太守行府州國事後臨海王為征虜廣州豫章王為車  
騎揚州晉安王為征虜南充州岱歷三府諮議遷驃  
騎長史領廣陵太守新安王子鸞以盛寵為南徐州高  
選佐史孝武召岱謂之曰卿美效夙著兼資宦已多今  
欲用卿為子鸞總刺史之任無謂小屈終當大伸也

王琨初仕宋為歷陽內史孝武以琨忠實徙為寵子新

安王東中郎長史歷右衛將軍度支尚書出為永嘉王左軍始安王征虜二府長史皆孝武諸子也

王僧虔初仕宋自太子庶子出為豫章王子尚撫軍長史遷散騎常侍復出為新安王子鸞北中郎長史二藩皆孝武之愛子也

陸慧曉為太子洗馬建元初武陵王暕守會稽太祖為精選僚吏以慧曉為征虜功曹

王績為東陽太守武帝為撫軍時吏部尚書張岱選績



為長史呈選牒太祖笑謂岱曰此素望也

張沖建武中為廬陵王北中郎司馬未拜豐城公遙昌為豫州帝慮寇未已徙仲為征虜長史南梁郡太守

胡諧之為武帝江州別駕文惠太子初鎮襄陽帝以諧之心腹出為北中郎征虜司馬扶風守爵闕內侯在鎮毗贊甚有心力

崔慧景為南郡內史南蠻長史加輔國將軍內史如故先是蠻府置佐資用甚輕至是始重其選

孔琇之為吳興太守時明帝輔政防制諸藩致密旨于上佐隆昌元年遷琇之為寧朔將軍晉熙王冠軍長史江夏內史行郢州事

梁張率字士簡為秘書丞直壽光省晉安王戍石頭以率為雲麾中記室王遷南充州轉宣毅諮議叅軍兼記室王還都率除中書侍郎王為荊州復以率為宣惠諮議領江陵令府遷江州以諮議領記室出監豫章臨川郡率在府十年恩禮甚篤

到溉為湘東王繹輕車長史行府郡事武帝敕繹曰到溉非直為汝行事足為汝師

江革為少府卿時武陵王在東州頗自驕縱高祖召革面敕曰武陵王年少臧盾性弱

盾王之官屬也

不能規正欲以

卿代為行事非卿不可不得有辭乃除折衝將軍東中郎武陵王長史會稽郡丞行府州事

後魏鄧述為齊州刺史初改置百官始重公府元佐時太傅元丞出為并州刺史以述為太傅長史帶太原太

守

刁整字景智少有大度頗涉書史為郡功曹太和十五年奉朝請孝文都雒親自臨選除司空法曹參軍從帝南討命廣陽王嘉鎮荊州以整為嘉外兵參軍事

崔珽為典屬國下大夫太和十八年大將軍宋王劉昶南鎮彭城詔假立義將軍為昶府長史珽以疾辭免乃以王肅為長史

李憑唐茂盧尚之孝文時趙郡王幹為都督冀定瀛三

州諸軍事詔以憑為長史茂為司馬尚之為諮議參軍以輔弼之

傳永字修期為任城王長史王肅之為豫州以永為平南長史咸陽王禧慮肅難信言於孝文孝文曰已選傳修期為其長史雖威儀不足而文武有餘矣肅以永宿士禮之甚厚永亦以肅為孝文眷遇盡心事之情義至穆

崔鴻為尚書都兵郎中永平初豫州城人白早生殺刺

史司馬悅據懸瓠叛詔鎮南將軍邢巒討之以鴻為行  
臺鎮南長史

李系為主客郎齊文襄王攝選以系為司徒諮議參軍  
因謂之曰自郎署至此所謂不次以卿人才故有此舉耳  
後周薛寘西魏末為中書令時車騎大將軍儀同三司  
燕公于謹征江陵以寘為司錄軍中謀畧寘並參之  
薛端字仁直太祖時大軍東討以柱國李弼為別道元  
帥妙簡首僚數日不定帝謂弼曰為公思得一長史無

過薛端對曰真其才也乃遣之

樂遜為小師氏下大夫以經術教授譙王儉以下束脩  
行弟子之禮及衛公直鎮蒲州以遜為直府主簿加車  
騎將軍左光祿大夫

隋元巖為兵部尚書高祖初即位遣晉王廣鎮并州蜀  
王秀鎮益州盛選寮佐於時巖與王韶俱以骨鯁知名  
物議稱二人才俱侔於高類由是拜巖為益州總管長  
史韶為河北道行臺右僕射高祖謂之曰公宰相大器

今屈輔我兒亦如曹叅相齊之意也及巖到官法令明  
肅吏民稱焉

令狐熙為上開府會蜀王秀出鎮於蜀綱紀之選盛屬  
正人以熙為益州總管長史

楊昇為宗正少卿蜀王秀之鎮益州也朝廷盛選綱紀  
以昇方直拜益州總管長史賜錢二十萬縑三百疋馬  
五十匹而遣之

宇文弼領太子虞侯時朝廷以晉陽為重鎮并州總管



必屬親王長史司馬亦一時高選前長史王韶卒以攷  
有文武幹用出為并州長史

皇甫誕開皇中為尚書左丞時漢王諒為并州總管朝  
廷盛選寮佐前後長史司馬一時名士高祖以誕公方  
著稱拜并州總管司馬總府政事一以諮之諒甚敬焉  
趙軌開皇中自齊州別駕徵至京師時衛王爽為原州  
總管高祖見爽年少以軌所在有聲授原州總管司馬  
源師為尚書右丞時蜀王秀頗違法度乃以師為益州

總管司馬

劉臻開皇中為儀同三司左僕射高潁之伐陳也以臻隨軍典文翰進爵為伯

唐宇文歆為右衛將軍武德初齊王元吉為并州總管時劉武周南侵汾晉遣歆助元吉守并州

封倫為內史侍郎武德初太宗之討王世充高祖召倫叅謀軍事以功封平原縣公兼天策府司馬

溫彥博為中書侍郎武德中突厥入寇高祖命右衛大

將軍張理為并州道行軍總管出拒之以彥博為行軍  
長史

竇昭為少卿監天寶末玄宗幸蜀以永王璘為山南東  
路及黔中江南西路節度度支採訪以昭為之副

鄧景山為隴西太守天寶末玄宗以豐王珙為威武都  
督領河西隴右安西北庭等路節度採訪使以景山為之副  
裴冕為御史中丞肅宗即位於靈武以元子廣平王領  
朔方河東河北三道節度使以冕為之副

蘇震為吏部侍郎暢瑾為諫議大夫至德初肅宗以廣平王為天下兵馬元帥以震瑾為副使判官

李進為御史中丞寶應初代宗以元帥雍王統河東朔方及諸道行營兵馬時回紇兵馬十餘萬東討逆賊史朝義以進為行軍司馬又以中書舍人韋少華為掌書記

李復大歷中歷江陵府司錄江陵少尹建中初李希烈背判荆南節度張伯儀數出兵為希烈所敗時朝廷憂

之以復久在江陵得軍州人心時復在母喪乃起復為江陵少尹兼中丞充節度行軍司馬

蕭復為兵部侍郎建中末晉王誼為揚州大都督持節荆襄江西沔鄂等道節度使兼諸將軍行營兵馬都元

帥討李希烈以復為戶部尚書兼御史大夫充帥統軍

長史

舊令有行軍長史以復父名衛更之

又以新除潭州刺史孔巢父為

右庶子兼御史中丞行軍左司馬山南東道節度行軍司馬檢校兵部郎樊澤為諫議大夫兼御史中丞行軍

右司馬刑部員外郎劉從一為吏部郎中侍御史韋贇  
為工部郎中并兼御史中丞充判官兵部員外郎高叅  
為兵部郎中掌書記右金吾衛大將軍渾瑊為檢校工  
部尚書兼御史大夫為中軍虞侯又以太散騎常侍歸  
崇敬叅謀會朱泚亂不行

陸長源為汝州刺史貞元中董晉為宣武軍節度朝廷  
恐晉柔懦尋以長源為晉行軍司馬

李景畧為左羽林將軍貞元中對於延英殿奏論衍衍

有大臣風采時河東李說有疾詔以景畧為太原少尹  
節度行軍司馬時方鎮節度使少徵入換代者皆死亡  
乃命為行軍司馬盡簡自上意受命之日人心屬之  
郝士美未冠為陽翟丞李抱真鎮潞州邀為從事雅有  
叅贊之績其後易二帥皆詔士美佐之

裴向為戶部員外郎德宗季年天下方鎮副倅多選自  
於朝防一日有變遂就授之節制向以選為太原少尹  
德宗召見喻旨尋用為行軍司馬兼御史中丞

辛秘為湖州刺史僉以材任將帥元和初太原節度范希朝領師出討王承宗詔徵秘為河東行軍司馬

崔弘禮為棣州刺史元和中魏博田弘正請入覲思得副其事者弘禮以選授衛州刺史充魏博節度副使久之除鄭州刺史長慶元年劉摠入覲張弘靖移鎮范陽復以弘禮檢校左散騎常侍充幽州盧龍軍節度副使胡証為長安縣令元和中田弘正以魏博內屬詔証以左庶子為之副



馬總為刑部侍郎元和十二年門下侍郎平章事裴度  
出為彰義軍節度淮西宣尉處置等使憲宗以總兼御  
史大夫充副使右庶子韓愈兼御史中丞充行軍司馬  
司勳員外郎李正封都官員外郎馮宿禮部員外郎李  
宗閔並兼侍御史充判官書記

錢可復為禮部郎中太和末翰林侍講學士工部尚書  
鄭注出鎮鳳翔文宗以可復為檢校兵部郎中兼御史  
中丞充鳳翔行軍司馬兼賜紫以駕部員外郎盧簡能

為檢校司封郎中兼侍御史充鳳翔節度判官以主客員外郎蕭傑為檢校工部郎中兼侍御史充鳳翔觀察判官並賜緋以左拾遺盧茂弘為鳳翔節度掌書記

後唐任圜為工部尚書同光二年魏王繼岌為伐蜀行營都統莊宗以圜及翰林學士李愚從王出征叅預軍機

任贊為刑部侍郎長興四年秦王從榮為兵馬元帥以贊為兵部侍郎充元帥府判官

馬義為比部郎中天福中以為檢校尚書吏部郎中兼御史中丞充河陽節度判官朝廷選佐皇子故也

漢張允初仕後唐為兵部員外郎知制誥清泰初皇子重美為河南尹典六軍諸衛事時朝廷選叅佐以允剛介改給事中充六軍判官

周張可復為左諫議大夫漢乾祐初湘陰公鎮徐方朝行中選可倅戎者因授武寧軍節度副使檢校禮部尚書

王敏為侍御史世宗鎮澶淵太祖以敏謹厚有稱遂命為澶州節判及世宗尹正王畿改開封少尹

倚任

夫居牧伯之任當將帥之重雖復奉法遵職盡節効命亦何嘗不推擇僚佐咨諏委賴然後政成而功立者哉由漢以來選辟甚盛乃有待遇隆篤周旋倚任至於條教憲令俾之裁處機謀戎務咸用關決假其風望以挾彈豪縱倚其忠厚以總督居留極其辭藻之能施之文

檄之用知人而善使推誠而不疑繇是懷才者得盡其  
長立義者得宣其教叶贊斯至勲業用彰古人謂申於  
知己者此之謂也

漢黃霸為河南太守丞霸為人明察內敏又習文法為  
丞處職當於法令太守甚任之

陳湯為大將軍王鳳從事中郎幕府事壹決於湯

後漢劉平為濟陽郡丞太守劉育甚重之任以郡職

韓稜潁川舞陽人初為郡功曹太守葛興中風病不能

聽政稜陰代興視事出入二年令無違者

朱穆舉孝廉屬江淮盜賊羣起大將軍梁冀素聞穆名乃辟之使典兵事甚見親任

趙勤南陽人太守桓虞召為功曹委以郡事嘗有重客過虞欲託一事為曹吏虞曰我有賢功曹趙勤當與議之客潛於內中聽虞乃問勤勤對曰恐未合衆客曰止止勿復道也

范滂字孟博汝南人太守宗資請署功曹委任政事時

人謠曰汝南太守范孟博南陽宗資主畫諾

岑暉字公孝南陽太守成瑨下車欲振威嚴聞暉名請

為功曹時人謠曰南陽太守岑公孝弘農成瑨但坐嘯

王渙為廣漢功曹太守陳寵徵為大司農和帝問何以

為治寵曰臣任功曹王渙由是知名

一云寵顯用良吏  
王渙錚顯以為腹

心訟者日減  
郡中清肅

陳蕃為汝南郡主簿太守王堂搜才禮士不苟自專乃  
教授史曰古人勞於求賢逸於任使故能化清於上事

緝于下其憲章朝右簡覈朝職委功曹陳蕃裨政理務  
拾遺補闕任主簿應嗣庶循名責實察言觀效焉自是  
委誠求當不復妄有辭教郡內稱治

魏審配漢末為袁紹冀州別駕紹委以腹心并摠幕府  
臧洪廣陵人漢末為郡功曹太守張超兄邈謂超曰聞  
弟為郡守政教威恩不由已出動任臧洪洪果何人超  
曰洪才略智術優超超甚愛之海內奇士也邈即引見  
洪與語大奇之



蔣濟為太祖丞相主簿西曹屬令曰舜舉臯陶不仁者  
遠臧否得中望於賢屬

楊修字德祖為太祖丞相倉曹屬主簿是時軍國多事  
修摠知內外事皆稱意自魏太子已上並爭與交好

徐奕字季才為太祖司空掾屬從西征馬超超破軍還  
時關中新服未甚安留奕為丞相長史鎮撫西京稱其  
威信轉為雍州刺史復還為東曹屬太祖征吳徙為留  
府長史謂奕曰君之忠亮古人不過也然微太嚴昔西

門豹佩韋以自緩夫能以柔弱制剛彊者望之于君也今使君統留事孤無復還顧之憂也

滿寵字伯寧山陽昌邑人也年十八為郡督郵時郡內李朔等各擁部曲害於平民太守使寵糾焉朔等請罪不復鈔略

蜀蔣琬字公琰為丞相諸葛亮叅軍亮住漢中琬與長史張裔統留府事後代裔為長史亮素外出琬嘗足食足兵以相供給亮每言公琰託志忠雅當與吾共贊王業

者也

楊儀為諸葛亮長史加綏軍將軍亮數出軍儀嘗規畫分部籌度糧穀不稽思慮斯須便了軍戎節度取辦於儀

吳劉靖盧江人孫皓為征虜將軍督夏口委靖以得失委江夏李允以衆事廣陵吳碩河南張梁以軍旅而傾心親待莫不自盡

晉裴秀歷文帝安東及衛將軍司馬軍國之政多見信

納遷散騎常侍帝討諸葛誕秀與尚書僕射陳泰黃門  
侍郎鍾會以行臺從豫參謀略

山濤為文帝大將軍從事中郎鍾會作亂於蜀帝將西  
征時魏氏諸王公並在鄴帝謂濤曰西偏吾自了之後  
事深以委卿以本官行軍司馬給親兵五百人鎮鄴

王祥為呂虔徐州別駕虔委以州事州界清靜政化大  
行時人歌之曰海沂之康每賴王祥邦國不空別駕之

功一云民事一以委  
之世多其任能

郭舒順陽人王澄為荊州刺史既至鎮日夜縱酒不親庶事雖寇戎急務亦不以在懷擢舒于寒悴之中以為別駕委以州府

羅尚字敬之善屬文荊州刺史王戎以尚及劉喬為參軍並委任之

劉毅字仲雄僑居陽平太守杜恕舉為功曹月餘日沙汰郡吏百餘人為之語曰但聞劉功曹不聞杜府君應詹為鎮南大將軍劉弘長史弘詹之祖舅請之曰君

器識弘深後當代老子子荆南矣乃委以軍政弘著績  
漢南詹之力也

溫嶠為劉琨平北大將軍參軍琨遷司空以嶠為右司  
馬時并土荒殘寇盜羣起石勒劉聰跨帶疆場嶠為之  
謀主琨所憑恃焉

諸葛恢為元帝瑯琊王從事中郎愍帝即位徵用四方  
賢雋召恢為尚書郎王以經緯碩才疏留之

卞壺字望之元帝為瑯琊王鎮建業召為從事中郎委

以選舉甚見親仗

趙裔為王導從事中郎南頓王宗反裔殺宗於是導及  
庾亮並倚仗之轉鎮軍將軍

毛穆之寶之子果毅有父風為安西將軍庾翼參軍翼  
等專制陝西以子方之為建武將軍守襄陽方之年少  
翼選武將可信仗者為輔弼乃以穆之為建武司馬

王珣為桓溫大司馬主簿時溫經略中夏竟無寧歲軍  
中機務並委珣焉

江道為吳令中軍將軍殷浩將謀北伐請為諮議參軍  
浩甚重之遷長史浩方修復雒陽經營荒梗道為上佐  
甚有輔弼之益軍中書檄皆以委道

劉鍾為劉牢之鎮北參軍督護高祖每有戎事鍾不辭  
艱劇專心盡力甚見愛信

宋劉穆之高祖初定京城辟為車騎主簿諸大處分皆  
倉卒立定並穆之所建也遂委以腹心之任動止諮焉  
穆之亦竭節盡誠無所遺隱從征廣固還拒盧循常居



幕中畫策決斷衆事劉毅等疾穆之見親每從容言其  
權重高祖愈信仗之後遷太尉中軍司馬高祖西伐司  
馬休之中軍將軍長沙王道璘知留任而事無大小一  
決穆之乃加丹陽尹高祖西討劉毅以諸葛長民監留  
府摠攝後事高祖疑長民難獨任留穆之以輔之加建  
威將軍置佐吏配給實力長民果有異謀而猶豫不能  
發乃屏人謂穆之曰悠悠之言皆云太尉與我不平何  
以至此穆之曰公沂流遠伐而以老母稚子委節下若

一毫不盡豈容如此邪意乃小安高祖還長民伏誅

臧燾為通直郎高祖鎮軍車騎中軍太尉諮議參軍高祖北伐闕維大司馬瑯琊王同行除大司馬從事中郎  
摠留府事

謝景仁為高祖車騎司馬及高祖北伐時大司馬瑯邪王天子母弟屬當儲副高祖深以根本為憂轉景仁為  
大司馬專摠府任

徐羨之為高祖太尉左司馬高祖北伐掌留任以副貳

劉穆之

謝晦為高祖太尉主簿從征闕雒內外要任悉委之

王誕為高祖太尉諮議叅軍轉長史盡心歸奉日夜不懈高祖甚委使之

張茂度為高祖太尉主簿揚州治中從事史高祖西伐劉毅茂度居守留州事悉委之軍還遷中書侍郎高祖北伐闕雒復任留州事

王華為文帝司馬太祖入奉大統留華摠後任

顏竣為孝武安北鎮軍北中郎府主簿孝武鎮潯陽遷南中郎記室叅軍元嘉三十年春以父延之致仕固求解職不許賜假未發而孝武舉兵入討元凶轉諮議叅軍領錄事任總外內并造檄書孝武發潯陽便有疾領錄事自沈慶之以下並不得相見唯竣皆專斷施行

張邵初為世子中軍叅軍武帝北伐邵請見曰人生危脆必當遠慮劉穆之若邂逅不幸誰可代之事業如此苟有不諱事將如何帝曰此自委穆之及卿耳又為文

帝荊州司馬領南郡相事悉決於邵

劉湛為彭城王義康豫州長史梁郡太守義康弱年未  
得親政府州事悉委湛後為江夏王義恭撫軍長史湛  
子琰于江陵病卒湛求自送喪還都義恭亦為之陳請  
文帝答義恭曰吾亦得湛啓事為之酸懷乃不欲苟違  
所請但汝弱年新涉庶務八州殷曠專斷事重疇咨委  
仗不可不得其人量算二三未獲便相順許今答湛啓  
權停彼莖頊朝臣零落相繼寄懷轉寡湛實國器吾乃

金史卷一百一十六  
七百十六  
欲令其引還直以西夏任重要且停此事耳汝慶賞黜  
罰豫闕失得者必宜悉相委寄

庚登之為衡陽王義季征虜長史義季少年未親政衆  
事一以委之

范曄為始興王濬後軍長史領南下邳太守及濬為揚  
州未親政事悉以委曄

謝方明為左將軍道璘長史高祖命府內衆事皆諮決  
之隨府轉中軍長史尋更加晉陵太守復為驃騎長史南

郡相委任如初

江湛為吏部郎隨王誕為北中郎將南徐州刺史以湛為長史南東海太守政事悉委之

南齊胡諧之南昌人武帝頓盆城使諧之守潯陽城及為江州復以諧之為別駕委以事任

沈沖字景綽為武帝征虜長史潯陽太守甚見委遇帝還都使沖行府州事

江祐為明帝驃騎諮議叅軍帝時輔政委以腹心

沈瑀為竟陵王子良府參軍領揚州部傳從事子良甚  
相知賞家事皆委瑀子良薨瑀復事刺史始安王遙光嘗  
被使送民丁速而無怨遙光謂同使吏曰爾何不學沈瑀  
所為乃令瑀專知州獄事

李珪之字孔璋為蔡興宗安西府佐委以職事清治見  
知

宗史為南康王荊州別駕時西土位望唯史與同郡樂  
謁劉坦為州人所推信故領軍將軍蕭穎胄深相委仗



每事諮焉

徐摛為晉安王諮議叅軍王總戎北伐以摛兼寧蠻府長史叅贊戎政教命軍書多自摛出

孔休源為晉安王府長史南蘭陵太守別敕專行南徐州事休源累佐名藩甚得民譽王深相倚仗軍民機務動止詢謀嘗于中齋別施一榻云此是孔長史坐人莫得預焉其見敬如此

梁蔡道恭齊末為和帝西中郎中兵叅軍帝起兵蕭穎

冑以道恭素著威略專相委任

王茂為高祖雍州長史帝以王佐許之事無大小皆詢焉

何遠為後漢軍鄱陽王恢錄事參軍在府盡其智力知無不為恢亦推心仗之恩寄甚密

蕭允為晉王長史王為南豫州允從為長史時王尚少未親民務故委允行府州事

劉毅為湘東王中記室太清中侯景亂世祖稱制上疏

書檄多委焉殺亦竭力盡忠甚蒙賞遇

許亨為太尉王僧辨從事中郎與吳興沈景對掌書記  
府朝政務一以委焉

庾黔婁鄉人鄧元起為益州刺史以黔婁為錄事參軍  
又得荊州刺史蕭遙欣故客蔣光濟並厚待之任以州  
事黔婁甚清潔光濟多計謀並勸為善政

劉盈為岳陽王察中郎府錄事參軍隨察之鎮有器度  
勤于公軍國經謀頗得察預

陳謝岐仕梁為山陰令侯景亂岐流寓東陽景平依於  
張彪彪在吳郡及會稽庶事一以委之彪每征討嘗留  
岐監郡知後事

趙知禮字齊旦高祖討元景仲引為記室常侍左右深  
被委任當時計畫莫不預焉知禮亦多所獻替

陸山才字孔章為周文育南豫州都督長史文育不知  
書疏政事悉以委之文育南討歐陽頔計畫多出山才  
及文育西征王琳留山才監江州事仍鎮豫章

盧淵為京兆王愉兼長史賜絹百疋愉既年少巨細多決于淵淵以誠信御物甚得東南民和

陸見賢侍中繕之兄子宣帝為揚州牧乃以為治中從事史深被知遇歷給事黃門侍郎

程文季為始興王府門內中直兵參軍是時王為揚州刺史鎮治城府中事悉以委之

後魏辛琛為滎陽郡丞孝文南征太守元麗從輿駕詔琛曰委郡事如太守也

高顯自符璽郎中出為冀州別駕未之任屬刺史元愉  
據州反宣武遣尚書李平為都督率衆討之平以顯彼  
州領袖乃引為錄事參軍仍領統軍軍機取舍多與參  
決

揚機字顯略為河南尹元暉功曹暉尤委以郡或謂暉  
曰弗躬弗親庶人弗信何得委事于機高卧而已暉曰  
吾聞君子勞於求士逸於任賢吾既委得其才何為不  
可由是聲名更著

陽固為尚書考功郎大軍征破石敕為僕射李平行臺  
七兵郎平竒固勇敢軍中大事悉與謀之

崔光韶為濟州輔國府司馬刺史高祖甚知之政事多  
委訪焉

甄楷字德旨定州人刺史廣陽王淵被徵還朝時楷丁  
憂在鄉淵臨發召楷兼長史委以州任

高緒為冀州儀同府中司兵叅軍為府主封隆之所賞  
隆之行梁州引自隨常令摠攝數郡

房天樂為青州別駕大將軍文秀拔為長史督齊郡州府之事一以委之

高道穆初為蕭寶寅行臺郎中軍機之事多以委之大都督崔延伯敗後賊勢轉彊屢請益兵朝廷不許寶寅謂道穆曰非卿一行兵無益理遂令乘傳赴雒靈太后親問賊勢道穆具以狀對太后怒曰比來使人皆言賊弱何獨云其強也道穆曰前使不實者當是冀陛下恩願望霑爵賞臣既忝使人不敢虛妄願令近臣親簡足知



虛實

楊侃為叔椿雍州錄事叅軍帶長安令府州之務多所  
委決

崔康為彭城王總衛軍府錄事叅軍總從征行招致壯  
俠以為部下總目之謂左右曰吾當寄胆氣於此人

姜儉為太尉外兵叅軍蕭寶寅討關西引為開府屬軍  
機謀略多所叅預儉亦自謂遭逢知己遂竭誠委託

盧陽烏為彭城王府長史京兆王愉拜都督徐州刺史

以陽烏兼長史州事巨細委之

朱瑞為將軍爾朱榮府戶曹參軍瑞長厚質直敬愛人  
士又為大行臺郎中甚為榮所親任

劉貴為爾朱榮府騎兵參軍榮性猛急貴尤嚴峻每見  
任使多愜榮心遂被信遇位望日重加撫軍將軍

北齊薛琰東魏天平初神武引為丞相長史琰宿有能  
名深被禮遇軍國之事多所闕知琰亦推誠盡節屢進

忠謹

張華原字滿國少明敏有器度神武開驃騎府引為法曹叅軍遷大丞相府屬仍侍左右從于信都深為高祖所親待高祖每號令三軍府嘗令宣諭意旨

孫纂為神武相府主簿掌文筆能通鮮卑語兼宣傳號令當煩劇之任大見賞重

趙彥深為神武丞相功曹叅軍專掌機密及文襄嗣位丞相慮河南有變乃自巡撫委彥深後事轉大行臺都官郎中臨發握手泣曰以母弟相託幸得此心既而內

外寧靜彥深之力也

裴昭字元景為文襄府墨曹參軍甚見親委與陳元康  
崔暹等參謀機密

裴雋為幽州刺史盧文偉平北府長流參軍雋案舊迹  
修督亢陂溉田萬餘頃民賴其修立之功多以委焉

崔昂文襄在藩嘗委以腹心之任及入輔朝政召為開  
府長史時勲將親族賓客在都下放縱多行不軌孫騰司  
馬子如之門尤劇昂受帝密旨以法繩之未幾之間內

外齊肅

李義深為并州長史時刺史可朱渾道元不親細務民事多委義深甚濟機速

後周令狐整初為後魏東陽王元榮主簿委以庶務畫諾而已

趙善初為後魏爾朱天光主簿天光討邢杲及万俟醜奴以善為長史軍中謀議每叅預之

蘇亮初為後魏齊王蕭寶寅叅軍歷開府主簿記室叅

軍寶寅稱大將軍仍為之掾寶寅雅知重亮凡有文檄  
謀議皆以委之尋行武功郡事甚著聲績長孫稚爾朱  
天光等西討並以亮為郎中專典文翰及賀拔岳為關  
西行臺引亮為左丞典機密

呂思禮初為後魏關西大行臺賀拔岳郎中與姚幼愉  
入關俱為岳所重專掌機密甚有時譽

柳虬初為後魏馮翊王季海行臺郎中時軍旅務殷虬  
勵精從事或通夜不寢季海嘗云柳郎中判事我不復

重看

李昶初為後魏綏德公陸通司馬太祖許之旭雖年少通特加接待公私之事咸取決焉

王思政初為後魏員外散騎侍郎屬万俟醜奴宿勒明達等擾亂闕右北海王顥率兵討之啓思政隨軍軍中所有謀議並與參詳

申徽為太祖夏州記室叅軍兼府主簿太祖察徽沉密有度量每事信委之

長孫儉為太祖夏州錄事深敬器之賀拔岳被害太祖  
赴平涼凡有經綸謀策儉皆參預

趙肅字慶雍雒陽人大統三年獨孤信東討肅為司州  
別駕兼督糧儲軍用不匱太祖聞之謂人曰趙肅可謂  
雒陽主人也

柳敏字白澤為太祖丞相府戶曹叅軍兼記室每有四  
方賓客常令主之爰及吉凶禮儀亦令監綜

馮遷為晉公護府掾性質直小心畏慎雖居樞要不以



勢位加人兼明練時事善于斷決每校閱文簿孜孜不倦從晨逮夕未嘗休止以此甚為護所委任

隋陰壽為高祖丞相掾尉迥之亂韋孝寬以元帥擊之令壽監軍時孝寬有病不能親摠戎事每卧帳中遣婦人傳教命三軍綱紀皆取決于壽以功進位上柱國

盧昌衡為壽州摠管宇文述長史述甚敬之委以州務李圓通為秦王并州摠管長史王仁柔自弱少斷決府中事多決於圓通

唐任瓌陳末為衡州司馬都督王勇甚敬異之委以州府之務

裴矩初仕隋伐陳之役領元帥記室及陳平晉王令矩與高頴收陳圖籍歸之秘府

李靖為趙郡王孝恭行軍長史討蕭銑高祖以孝恭未更戎旅三軍之任一以委靖

牛仙客開元中為河西節度蕭嵩判官嵩以軍政委仙客清勤不倦接待上下必以誠信

裴寃天寶中為京畿採訪使王鉞判官寃雖無學術守職通明果於臨事鉞甚委之

韋元甫初任滑州白馬尉以吏術知名本道採訪使韋陟深器之奏充支使與同幕判官員錫齊名元甫精於簡牘錫詳于訊覆陟推誠任之時謂員推韋狀

呂諲為隴右河西節度哥舒翰度支判官性謹守勤於吏職雖同寮追賞而塊然視事不離案簿翰益親之

段秀實至德初為安西判官父歿喪毀過禮都將李嗣

業授節制思秀實如失左手表請起復為義王友充  
節度判官

張羣為京兆府司錄肅宗以府尹劉晏判度支晏委府  
事於羣及杜亞綜大體議論號為稱職

李復大歷中為江陵府司錄精曉吏道尹衛伯玉厚遇  
之府中之事多以諮委性刻削為伯玉所信奏為江陵  
令遷少尹

李融大歷中為福建都團練鮑防判官防移江西融復

為團練判官政事多決于融

張建封大歷中為河陽節度馬燧判官李靈曜反於梁  
宋間與魏博田悅犄角同為叛燧與李忠臣同討平之  
軍務多以委建封人稱其能

鄭雲逵建中末奉天之難以諫議大夫奔赴行在居數  
日神策行營節度李晟表為行軍司馬戎略多咨之

王鏐貞元中為江西節度嗣曹王臯都虞侯鏐小心習  
業事善探府軍情狀至于語言動靜巨細畢以白臯臯

亦推心委之雖家醮妻女之會鍰或在焉鍰亦感臯之  
知事無所避

盧羣貞元中為江西節度嗣曹王臯判官曹王移鎮江  
陵襄陽羣皆佐使府幕中之事多以諮委以正直聞  
嚴震貞元中為東川節度判官韋收薦為押衙改鎮王  
府司馬嚴武以宗姓之故軍府之事多以委之

元義方精於吏理貞元中為京兆府司錄時韋夏卿李  
實繼居尹正府之公務一以諮之

梁敬翔為太祖宣武從事太祖與蔡賊相拒累歲城門之外戰聲相聞機略之間翔頗預之太祖大悅恨得翔之晚故軍謀政術一以諮之蔡賊平奏授太子中允賜緋從平充鄆檢校水部郎中

裴迪太祖至汴延在賓席恩禮甚優厥後每統帥出征咸命主留事迪亦勤瘁夙夜不失所委累遷職至節度判官官至檢校僕射光化初太祖勝于院曰謬膺重委摠校三藩軍機雖罄于拙謀民政全繫于右席節度裴

判官詳明吏理首冠賓筵冰蘖不渝始終如一自此應  
諸州錢穀刑獄等事並請指揮乃徧報管內咸遣知委  
後唐司空顥為魏州節度使羅紹威掌書記紹威聚書  
萬卷尤工篇什每公私宴集無不屬和幕中皆知名士  
而顥益蒙睠遇軍機政術必先圖議誅牙軍之謀顥亦  
預焉

淳于晏在霍彥威幕相得甚歡及歷數鎮皆為從事軍  
府之事至于私門事無巨細俱取決于晏雖為幕賓有



若家宰爾後公侯門客往往效之時謂之效淳故彥威  
所至稱治由晏之力也

魯張彭仕後唐為真定留守任園推官事無巨細悉訪  
於彭

冊府元龜卷七百十六